

Gij Loqsiengj Fag Cik Ndeu

贵港市覃塘区蒙公镇高占小学三年级 Leiz Cinli/雷进利



Naemjnaemj, fag cik ndeu baenzgoenz deng gyaeng youq ndaw hab vwnzgi, ndaw sim miz geijlai aen loqsiengj ne? Lajneix raeuz dingq de gag lwnh.

Aen loqsiengj daih'it, couh-dwg laeglemx ndonj ok gyausiz. Rox gou aeu guh gijmaz lwi? Gou aeu bae ndaw suenmak, bang makbwz-yanghgoj dingj hwet, lij aeu bang gwnz gomak gaj duz nonhaih, yienghneix gou couh miz haujlai baengzyoux lo. Haha, geijlai ndei saj! Geijlai sim'angq!

Aen loqsiengj daih'ngaih, couh-dwg caegcaeg buet haeuj ndaw suen-byaek bae. Rox gou aeu guh gijmaz lwi? Gou aeu youq ndaw mbaw byaekheu maj ok duhrangz gungj-ngetnget, roxnaeuz cang guh baenz

aen lwgbieng raezrangrang ndeu. Aen vanjvei diuqfoux ndaw suen byaek couh yaek heijguh lo! Haha, geijlai ndei saj! Geijlai sim'angq!

Aen loqsiengj daih'sam, couh-dwg riengjret diuq haeuj ndaw aen daemzbya bae. Rox gou aeu guh gijmaz lwi? Gou aeu vih gij gyaec bya'iq gang liengj liengzswd, youq gwnz aen liengj, lij boemz miz duz-goep loh naengdungx hung hausak-sak, mizmbangj youq gwnz dingj liengj dak daenggoenz, mizmbangj youq laj liengj doxgangj. Haha, geijlai ndei saj! Geijlai sim'angq!

Aen loqsiengj daih'sei, couh-dwg menhmenh byaij daengz henz rijiq bae. Rox gou aeu guh gijmaz lwi? Gou aeu bang duzroeg iq vad ruz, hawj duzmoed iq gaq giuz. Gwnz

giuz miz haujlai doenghduz iq byaij bae byaij dauq. Haha, geijlai ndei saj! Geijlai sim'angq!

Aen loqsiengj daih'haj, couh-dwg yaengyaeng daeuj ndaw ndoengfaex hung. Rox gou aeu guh gijmaz lwi? Gou aeu bang duz noucoengz iq guh faexsoux diuq gyaec, hawj duz gaenglwg guh biucieng yaep ndeu. Guh gij ciengjbaiz venq youq gwnz hoz haenx ndongqliklik. Haha, geijlai ndei saj! Geijlai sim'angq!

Bouxlawz hix mbouj rox, fag cik ndeu miz geijlai aen loqsiengj..... Couh lumj gij cih ndaem youq gwnz gaujceij, did geijlai ngaz, hai geijlai va, hot geijlai goj lwgnyez.

(bouxlauxsae son'gyauq: Cinz Cinhdonz/覃珍团)

Daxmeh Gou

上林县大丰镇中心学校四(2)班 Cinz Fubinh/陈富斌

Daxmeh gou yienghsiengq itbuen, hoeng de dwg lauxsae saedceij gou, son gou rox haujlai dauhleix guhvunz.

Daxmeh gou gig gaenxguh. De moix ngoenz deng guh haujlai hongranz, lij aeu ciuqgoq gou, dahnuengx caeuq daxbuz. Dahnuengx gig cabheiq, hawj daxmeh yousim lailai. Miz baez ndeu, dahnuengx veh dozveh, veh dwk veh dwk, dahnuengx couh youq gwnz daiz luenh veh, dawz gwnz daiz veh baenz najraiz. Daxmeh yawjraen le, heuh dahnuengx gaej veh lai. Doeklaeng daxmeh deng mad gwnz daiz byongh ngoenz bae, cij mad ndaej seuq. Daxmeh baeg lai lo, hoeng de mbouj dingz roengzdaej yietnaiq, youh guh hongranz. Daxmeh lumj duzcwz laux, vih ndaw ranz nyaengq baenz ngoenz.

Daxmeh hix gig simndei, gvansim ciuqgoq bouxlaux. Seizhah miz ngoenz ndeu banhaemh, daxbuz sawqmwh baenzbingh, daxboh mbouj youq ranz, baenzlawz guh ne? Daxmeh mbouj ngeix saekdi, sikhaek ciq gyaq cisamloek, doz daxbuz bae yihyen yawjbingh. Daxbuz youq yihyen seiz, daxmeh cungj dwg ndaw ranz caeuq yihyen song baih buet baedauq, mboujdan ciuqgoq gou caeuq dahnuengx, lij aeu ciuqgoq daxbuz, hoeng de coengzlaiz mbouj gyangz saek sing. Nanzgvaic daxbuz raen vunz cungj haenh, daxmeh gou dwg boux bawx ndei ndeu.

Daxmeh lij son gou rox guh-vunz aeu lauxsaed, mbouj ndaej



simdam. Miz baez ndeu, gou youq bakdou hagdangz gip ndaej aen daehngaenz ndeu. Cuengqhag le, gou angqfwngfwng dawz daehngaenz ma ranz, doiq daxmeh gangj: "Daxmeh, gou youq bakdou hagdangz gip ndaej aen daehngaenz ndeu." Daxmeh dingqnyi, nyinhcaen dwk gangj: "Mwngz youq bakdou hagdangz gip ndaej daehngaenz, wngdang gyau hawj hagdangz ciulingx, roxnaeuz deq bouxcawj daehngaenz daej lingx. Mwngz dawz daehngaenz ma ranz, bouxcawj ngaenzbau gig simgip. Mwngz vaiq di dawz daehngaenz gyau hawj hagdangz, hawj lauxsae roxnaeuz bohranz hagseng lingx." Gou dingqnyi vah daxmeh, sikhaek dawz daehngaenz gyau hawj hagdangz.

Daxmeh gou couhdwg yiengh-neix guh, yungh vah caeuq hengz-doengh de son'gyauq gou, yingjyangj gou, vixyinx gou, hawj gou gengangh majhung. Daxmeh gou caen dwg boux daxmeh ndei ndeu.

(bouxlauxsae son'gyauq: Vangz Gveiyangh/黄桂香)



Duzrwi

Gou deng duzrwi ndat le, fajnaj foeg baenz gyauejmou bae, lwgda cungj bienq iq lo, ninz nanznanz cij ninz ndaej ndaek bw.

"Duzrwi! Boh ha, duzrwi daej moq lo!" Gou fangzhwnz deng doek-saet ndiusingj.

"Ninz ha, gyanghwnz duzrwi mbouj okdaej go."

"Gou lau duzrwi! Aiyo, in lai lo. Boh ha, gou in lai!" Gou in lai youh daej moq lo.

"Gaej daej lai, boh lwnh aen gojgaeq ndeu hawj mwngz dingq, baenz lwi?"

Gou gyaec dingq gojgaeq, yienghneix couh mbouj daej lo.

"Lwnh aen gojgaeq duzrwi bw. Duzrwi mbouj luenh ndat vunz ne."

"Nyaenx de vihmaz ndat gou ne?"

"De laihnaeuz mwngz yaek gyongz aenrongz de go. Mwngz dwg mbouj dwg aeu ngafaex fad duzdaek ne?"

"Gou cungj yawj mbouj raen

rongzrwi ne."

"Wgo! Baezneix dwg duzrwi guh loeng lo." Boh laebdaeb naeuz dem. "Duzrwi deng dwk cij ndat vunz, gyoengqde yaek hendawz ndei aenrongz gyoengqde, hendawz ndei dangzrwi. De yienghneix guh dwg vih gyoengq doengzdoh de go."

"Nyaenx goj dwg vih swheij lwi?"

"Nauq bw, duzrwi ndat vunz de mbouj vih swheij ne. Duzrwi ndat vunz le, couh deng dai bae. De miz saenj laez ndeu ndwi, de aeu laez hoh ndang, baez ndat vunz le, saenj laez de couh mbouj miz lo. Duzrwi mbouj miz laez le, couh deng dai bae. Hoeng, mbouj miz saek duz lau dai bw."

"Duzrwi mbeidaeuz raixcaix! Ngoenzneix duzrwi ndat gou haenx, goj deng dai bae ma?"

"Wgo! Dai gvaq!"

"Doeknaiq lai! Ai, cungj gvaic gou." Yienghneix gou couh mbouj lau duzrwi saek di lo.

"Fajnaj mwngz lij in lwi?"

"Mbouj in baenzlai lo....." Gou vubvubvev gag naeuz, gvaq yaep couh ninz ndaek lo.

(Daj 《Bonjsei Sim Lwgnyez》 (Veiz Gizlinz raiz) senj okdaej, Lwgfwnzgmeh/卢奋长 hoiz)